

Zeitschrift: Schwyzerlüt : Zyschrif für üsi schwyzerische Mundarte

Band: 25 (1963)

Heft: 3

Artikel: Der Kari Grunder as Fründ und Dichter : (uf sy achzigscht Geburtstag am 20. Novämber 1961)

Autor: Jäggi, Beat

DOI: <https://doi.org/10.5169/seals-190141>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 24.08.2025

ETH-Bibliothek Zürich, E-Periodica, <https://www.e-periodica.ch>

Der Kari Grunder^{as Fründ und Dichter}
(uf sy achzgischt Geburtstag am 20. Novämber 1961)

Fründ und Dichter, zwöi Wort, wo eim im Läben unghüür vil chönne bedüte. I mängem Huus stoht hüt e Buecherschaft und i weiss, wies ou uf däm Buecherschaft der Reihe no goht. Die Wärk, wo me am liebste het, würde zoberscht häregstellt. Und wenn i mänger heimelige Stube d Wärk vo üsem liebe Kari Grunder uf em erschte Tablar stöh, chunnt das nit vo ungfähr. Er stoht drum bi vile vile Lüte as Dichter und Fründ gar höch im Kurs. Und s isch e grosse Kreis vo bodeständige Läser, wo der Dichter u sys Wärk träge. Wär mit em Kari zämechunnt, gspürt öppis bsunders: Güeti und Wärmi. S glyche gspürt me au us syne Gschichte und Theaterstück use. Und wo Güeti und Wärmi useme Dichterwärk useläbe, blybt öppis wien e Gluet, wo nie verlöscht. Wie mängisch han i doch scho amene stillen Obe d'Grunderwärk «Hammegg-Lüt», «Tröschteli», «Göt-tiwil» oder «Ds Wätterloch» abem Buecherschaft abegnoh und gläse drinne, jedi Gschicht ume neu gchüschtiget und jedesmol e früschi, grosse Freud erläbt. Eifachi Gschichten usem Läbe gschöpft; aber ebe die grossi Kunscht derby: Grad s'Chlyne, Un-schynbare wird vüregstellt und de no wie schön, ass me eifach vo Zyt zu Zyt no de Mönsche, wie si der Kari Grunder beschrybt, Längizyt überchunnt und de isch Gottlob de Buecherschaft nit wyt.

Wenn me so durs Land chunnt, i anderi Städt und Dörfer, und wenn me alli die vile Buechhandlige a der Stross a gseht, chönnts eim fascht e chly uheimelig z Muet würde. Buecher!... Buecher!... Hüüffe Buecher würde gschrive! De foht me, ohni dass me will, afoh grüble: Hets e Wärt, ass üsi Dichter Zyt und Gsundheit ufopfere für ihri Gottesgab und ganzi Buecher schrine? Sie göh jo under i dere Schwetti vo Wärk. U we me mit der Bahn durs Land fahrt,

was läse do d'Lüt? Usländerschünke, verzuckeret und verbögget, Illustrerti, oder ebe de «Wahre Geschichten» und andere Blooscht. Jo, hets de eigetli non e Wärt, dass e bodeständige Dichter vom ene schöne, guldige Herbschtmorge schrybt, vom ene eifache Huusmüeti, vom ene Brönner Liebu, vom ene Fläcke Heimat, wo Hammegg heisst?

E dummi Frog sägen i!... Jo, es het e Wärt und s isch nötig, bitter nötig! Es Dichterwärk wo usegwachsen isch usem Läbe und sälber es Stück Heimat bedütet, überduuret alls. Worum läse hüt no vil Lüt die Büecher wieder, wo sie i ihrer Juggedzyt scho gärn gha hei? Wyl ne die Büecher eben öppis bedüte und wyl sie ihri Rueh und Erholig finde drinne. ... Sälber erläbt am eigne Lyb: Won i öppen Achzähni gsi bi, si mer am Kari Grunder syni «Hammegg-Lüt» i d'Hand cho. I weiss no guet, wien i mi sälb Chehr uf e Samschtig z Obe gfreut ha, für das Buech ungstört chönne z'läse. Novämber ischs gsi und Hudelwätter derzue. Aber mys Wuchenänd isch voll Sunnen und Freud gsi. Die «Hammegg-Lüt» hei mi bhackt gha und i ha scho am Sunndig druf myne Lüte deheime die erschte Kapitel us däm Buech vorgläse, won i vo mym chlyne Lehrlingslohn gchauft gha ha. Useme Büecherprospäkt han i am Dichter sys Bild no usegschnitte, s'uf Karton uufzoge und obe am mym Bett uufghänkt. Fasch dryssg Johr si sythär a mir verbigange. Und i ha nit nume sälb fründlige Bild, nei au der Dichter as Fründ i mys Härz gschlosse.

As Lehrling het me fruecher e Wuche Ferie übercho. Für mi isch dozmol eis klar gsi: I muess d'Hammegg sälber gseh, mit eignen Auge. Und so bini as junge Grüenschnabel a mym erschte Ferietag zu üsem Solodurnerländli us pedalet, em schöne Bärnbiet zue. I gseh hüt no der Wägywyser, wo Walkringe druffe gstände isch und i gspüres no hüt, wie's mer warm und wohl worden isch, won i uf der

Hammegg obe gstande bi, uf sälbem Bode, wo mir denn scho so viel bedütet het, uf em Heimatbode vo mym liebe spätere Fründ. Us mym Erläbnis miteme Dichterwärk ischs mir scho früh klar worde, wien es Buech, wo Härz und Gmüet het, der Autor und der Läser chönne zämeführe.

So wie em Kari Grunder sys epische Wärk alli überspannti Schryberei vo de letschte Johren überduuret het, so läben au syni Theaterstück immer no i der glyche Früschi. Das sell allne der Muet mache, wo bis jetz z'schüch gsi si, ihri volkstümlichi Syte vom Läbe vürezcöhre.


Wär het nit scho vo der Hammeggchilbi ghört, es Volksfescht, wo der Dichter vor dryssg Johr sälber i Gang brocht het. So mängisch ass i scho a dere Chilbi gsi bi, han i nochhär immer wider müesse säge: Do cha niemer dranume rüttle. S'einzig Fescht wyt und breit, wo sy guet und gsund Geischt bhaltet het. Me muess nume die Lüt aluege, wo dört zämechöme: die gsunde, rotbackige Meitschi, die flotte Bursche, die heimelige Frauen und Manne, churz, der modärn Chladeridatsch mag nit bis uf d'Hammegg ufe und das verdanke mir em Kari Grunder ganz bsunders.

Landuf-landab sellen alli, wo s'Härz am rächte Fläcke hei, am zwängischte Novämber dra dänke, dass üse lieb Volksdichter Kari Grunder achzgi wird.

Paar Wuche später si üseren es paar gueti Fründe mit em Jubilar uf Chonolfinige, in es gmüetliges Eggeli goh fyre. Wien e Philosoph het üs der Kari Grunder dozmol us sym Läbe verzellt. Won i ne gfroggt ha, was ihm eigetli i däm lange usgfüllte Läben am meischten Ydruck gmacht heig, git er mer mit glänzigen Auge der Bscheid: Die vile guete Fründschaft! Jo, die het er gha und die würde übers Grab us wyters duure.


Beat Jäggi

Glückligi Zyten ufem Inseli am Thunersee




«Guri, guri!» het der Kari uf e See usegrüeft. U de sy sie
über ds Wasser derhör cho z fahre, die stolze Schwän...»

(Usem Bytrag vom Emil Balmer am Aarbärger Bott)



Em Grunder Kari sys Summerparadies ufem Inseli am Thunersee.



Der Kari Grunder i syner «Inseli-Wärkstatt». Uf däm Tisch si die chäche Theaterstück und Gschichte gmodlet worde.